

Pemuda PAS tegur Pakatan tak kawal ucapan, pandangan pemimpin
The Malaysian Insider
19 September , 2011
Oleh G Manimaran

KUALA LUMPUR, 19 Sept — Dewan Pemuda PAS pusat menegur Majlis Presiden Pakatan Rakyat tidak memberi perhatian ke atas ucapan dan pandangan diberikan pemimpin mereka sehingga mencetuskan kontroversi lalu merugikan perikatan itu.

Naib Ketuanya Raja Ahmad Al-Hiss berkata, pihaknya berharap Majlis Presiden Pakatan Rakyat akan lebih tegas dan berhati-hati dalam mengamalkan sikap memberi pandangan atau keputusan masing-masing.

“Kami melihat Majlis Presiden Pakatan Rakyat kurang memberi keprihatinan terhadap ucapan-ucapan dan pandangan-pandangan samada pimpinan dan wakil-wakil rakyat Pakatan Rakyat supaya selari dengan dasar Pakatan Rakyat dan parti masing-masing,” katanya dalam satu kenyataan dikeluarkan petang ini.

Raja Ahmad merujuk kepada pandangan Ahli Dewan Undangan Negeri (Adun) kawasan Kota Alam Shah, M. Manoharan yang mengatakan akan mengubah Jalur Gemilang jika Pakatan Rakyat mengambil alih kepimpinan negara.

“Bagi kami, tulisan tersebut keterlaluan dan tidak pernah sekali-kali dibincang mahupun terlintas difikiran Pakatan Rakyat untuk dilakukan.

“Hatta Kami akan terus mempertahankan nilai-nilai dan ciri-ciri jati negara yang sedia terdapat dalam Jalur Gemilang sedia ada,” katanya.

Raja Ahmad menambah pihaknya menganggap tulisan tersebut adalah imiginasi dan khayalan Manoharan tersendiri dan terlanjur dalam kenyataannya.

“Namun imiginasi seperti itu tidak boleh dibiarkan kerap dibiarkan tanpa sebarang peringatan dan tindakan.

“Kami juga ingin mengingatkan parti-parti dalam Pakatan Rakyat agar tidak ghairah mengeluarkan kenyataan yang mewakili Pakatan Rakyat tanpa merujuk Majlis Presiden Pakatan Rakyat terlebih dahulu tanpa mengira jawatan dan status mereka,” katanya lagi.

The Malaysian Insider
Hakcipta © 2011 The Malaysian Insider
Source: <http://www.themalaysianinsider.com/bahasa/article/pemuda-pas-tegur-pakatan-tak-kawal-ucapan-pandangan-pemimpin/>